



ATASSUT

UPA 2016/143

Siverth K. Heilmann

31.05. 2016

**Qanoq iliornikkut sulinerup imminut akilersinnaasusunngorlugu aaqqiivigineqarnissaa, isumaqaginnikkullu ikiorsiissutit sulileqqinnissamut aporfijunnaarlugit aaqqiivigineqarnissaat pillugu apeqquteqaat aallaavigalugu oqallinnissamik siunnersuut.  
(Inatsisartunut ilaasortaq Anthon Frederiksen, Partii Naleraq)**

Aallaqqaammut inatsisartuni ilaasortaq Anthon Frederiksen, Partii Naleraq apeqquteqaat aallaavigalugu oqallisissiaqarninnut qujanaq, imatullu naatsumik ATASSUT-miit oqaaseqarfigissavarput.

Soorunami assaat sulisinnaasut tamaasa atorfissaqartillugit, minnerunngitsumillu pisuussutitta uumassusillit imaani nunamilu suliffissaqartitsinerisa annertusiartuinnarnerat ilutigalugu, siunissamilu sulini nunami suliffiit pioreersut ataavarnissaannut minnerunngitsumillu aatsitassarsiornerup iluani annertusiartuinnartumik suliffissanik pilersitsinissamut aqutissiuussigutta, ATASSUT-miit qularutigingilarput, sulinerup imminut akilersinnaanera anguneqarujussuassasoq.

Aap Naalakkersuisuusartut inatsisartunilu ilaasortaaneq aqutigalugu, ataasianngelaluta maani inimi aalajangiivigisassat apeqquteqaatillu aallaavigalugit isummersuuteqartaqaagut oqallittarlutalu, taamaattumillu tupinnangilaq inatsisiliatsinnik peqqussutinilluunniit naleqqussaajuartariaqaratta. Siunnersuuteqartup tunngavilersuuteqarnermini tikkuagai eqqortortalerujussuupput.

ATASSUT-miilli oqaatigeqqiinnassavarput nuannaarutigalugulu, inuppassuaqarmat ukiorpassuarni sulilluartunik ikiorsiissutinillu pisariaqartitsinngitsunik, taamaattorli ilaatigut aamma inoqarmat suliffeqarfinni sulinikkut atugassaritinneqartartut pissutsit assigiinneqisut pissutigalugit suliinnarnissamut aporfissaqartarmat.

ATASSUT-miit siunnersuuteqartoq isumaqatigilluinnarparput oqarmat, inuk peqqissoq sulisinnaasorlu imminut ilaqtaminullu napatinniartussaammat. Aap, inuit peqqisut sulilersissinnaangilugut, suliffissaannik pilersitserusuttut politikikkut aqutissiuutinngikkutsigit. Ikorsiisarnermut suliinnarnissamullu aporfuilersimasut naleqqussaqqittariaqarnerilu avaqqunneqarsinnaangillat suliarli ingerlanneqarpoq.

ATASSUT-miit naggasiullugu oqaatigeqqillarput, siunissarput qaamavoq, suliffissat aningaasarsiorfissallu nutaat pilersitsiortorneqarpata, nunatsinni sulisinnaasut tamaviisaluunniit atoraluarutsigit, sulisussanik amigaateqalertussaavugut. Nunaqavissut sulisoriinnaarneqaannarnissaat ilisimasallu pigiinnarneqarnissannut ATASSUT-miit isumaqataaqaagut. Suliffissaqaannarnissarput nunattalu aningaasarsiornera unitsinneqassangippat, avataaniik suliartortoqarsinnaanera pisariaqartitsineq avaqqunneqarsinnaangilaq, taamaattumillu immitsinnut matunnaveersaartariaqartugut ATASSUT-miit ersarissumik oqaatigissavarput.

Taakkuupput apeqquteqaat aallaavigalugu oqallisissiamut ATASSUT-miit oqaatigiumasagut.